

გარდაცვლილის სულისათვის სიხარულია ის, რომ მისთვის ძვირფასი ადამიანები განსხვავებულად ცხოვრობენ



გვესაუბრება კუკიის წმინდა ნინოს სახელობის ტაძრის ღვთისმსახური, დეკანოზი არჩილ ხაჩიძე:

-სიხარული მარადიული თამდეგია ქრისტიანის ცხოვრებისა.

იაკობ მოციქული ამბობს: “ყოველივე სიხარულად შეპრაცხეთ, ძმანო” და თუნდაც იმ შემთხვევაში, “როდესაც განსაცდელთა შესცვივით პირად-პირადსა” ანუ თუნდაც პირადი განსაცდელი გქონდეთ, არ შედრკეთ და შინაგანად არ შეძრწუნდეთო.

წმინდა გაბრიელ ეპისკოპოსი ბრძანებს, რომ ადამიანს ძალიან მცირე პყოფნის სიხარულისათვის და ძალიან მცირე დამწუხრებისათვის.

სიხარული ღმერთთან ურთიერთობაა, მიბაძვა და დამსგავსება ღვთისადმი, რადგანაც ღმერთია მარადიული სიხარული. ადამიანი რაც უფრო მეტად დამოუკიდებელი ხდება თავის ცხოვრებაში, მით უფრო მეტად ბედნიერია. ადამიანი რაც უფრო მცირედით კმაყოფილდება, მით უფრო მალე ახერხებს იყოს ბედნიერი და ამით უფრო ნაკლებად

ექვემდებარება მწუხარებას. უწმინდესის ნათქვამს გავიხსენებ: ერთ-ერთ მონაზონთან სტუმრობისას, როდესაც მას საწოლის, პატარა მაგიდის და წყლის გრაფინის მეტი არაფერი აღმოაჩნდა კელიაში, ჰკითხა, აქ როგორ ცხოვრობო? მან კი უპასუხა, ვცხოვრობ როგორც დედოფალი.

ადამიანი თავის ცხოვრებას და თავის სიხარულს უნდა უთანაბრებდეს იმ სიხარულს, იმ სწორ გზას, რომელიც უფალმა მიგვითითა.

წმინდა იოანე ოქროპირი ამბობს, იმაზე დიდი სიხარული რა უნდა იყოს, რომ ადამიანმა შეძლოს ამა თუ იმ ვნებებისაგან, ცოდვებისაგან თავის დაღწევა. მაცხოვარი სიხარულისკენ მაშინ მოგვიწოდებს, როდესაც უფლის გულისთვის დავითმენტ ტანჯვანამებას.

უფალი ბრძანებს: " ნეტარ იყვნით თქვენ, რაჟამს გყვედრიდნენ და გდევნიდნენ და თქვან ყოველი სიტყვა ბოროტი თქვენდა მომართ სიცრუვით ჩემთვის. გიხაროდენ, რადგანაც სასყიდელი თქვენი ფრიად არს ცათა შინა". რომ მე სწორად ვიქცევი, ეს გზა უკვე ბედნიერებაა. ღმერთის წინაშე ყველა ცოცხალია და არავინ არის მკვდარი. წმინდა ეკლესია განსაკუთრებულად ღოცულობს თავისი ყველა წევრისთვის – როგორც ამქვეყნად, ისე იმქვეყნად მყოფთათვის.

“განუსვენე, უფალო, სულთა მიცვალებულთა, მონათა შენთათა, სადა იგი არა არს ჭირი მწუხარება, არა ურვა, არცა სულთქმა, არამედ სიხარული და ცხოვრება იგი დაუსრულებელი”.

რა არის ეს სიხარული? როგორ შეიძლება იხაროს ადამიანმა, თან იხაროს დაუსრულებლად? ერთადერთი მარადიული და დაუსაბამო ღმერთია. ამიტომაც ღმერთის გარეშე შეუძლებელია ადამიანმა სიხარული მოიპოვოს. რითი განსხვავდება ერთმანეთისგან ცოცხალის და გარდაცვლილის მდგომარეობა? იმით, რომ გარდაცვლილებს აღარ აქვთ უნარი რამე შეცვალონ. ისინი არიან უკვე თავისი თავისთვის საბოლოო მდგომარეობაში. როდესაც ისინი წარსდგნენ როგორც თავიანთ კერძო სამსჯავროზე, იმავე მდგომარეობით წარსდგებიან საზოგადო სამსჯავროზეც.

ვიცით, რომ დედა ეკლესიის ღოცვით, ღვთის წყალობით, ყველაფერი შეიძლება შეიცვალოს და ღმერთის მოწყალებამ შეიძლება ნებისმიერი ადამიანის მდგომარეობა სასიკეთოდ შეცვალოს. გარდაცვლილის სულისათვის სიხარულია ის, რომ მისთვის ძვირფასი ადამიანები განსხვავებულად ცხოვრობენ, მისთვის ძვირფასი ადამიანები ისე არ იქცევიან, როგორც თვითონ შეიძლება ერთ დროს იქცეოდა თავის ცხოვრებაში, მისთვის ძვირფასი ადამიანები აგრძელებენ ღოცვას; თუ მანამდე არ იყვნენ ეკლესიურები, ცხოვრობენ ეკლესიურად და თავიანთი მსახურებით შეეწევიან იმქვეყნად მყოფ თავიანთ ახლობელს და სიხარულს ანიჭებენ.

რამხელა სიხარულია, როდესაც გარდაცვლილი ადამიანის მიზეზით მისმა

ახლობლებმა ღმერთის დიდება დაიწყეს. ჯანსაღ საზოგადოებაში და ჭეშმარიტი ქრისტიანისთვის სასიხარულო მართლაც უფრო მეტია, ვიდრე სამწუხარო.

ადამიანი უნდა ხარობდეს იმით რაც სასიხარულოა. მოციქულები როდესაც დაბრუნდნენ მაცხოვართან და უთხრეს მის მიერ საქადაგებლად წარგზავნილებმა და გახარებულებმა, რომ შენი სახელით ეშმაკებიც კი გვემორჩილებიანო მაცხოვარმა უთხრა, ის კი ნუ გიხარია ეშმაკები რომ გემორჩილებიან, იმითი გაიხარე თქვენი სახელები მარადიულ წიგნში რომ არის ჩანერილი და იდიდებაო. რადგან თქვენ ის გააკეთეთ რაც უნდა გეკეთებინათ. ჩვენც იმით ვიხაროთ, რომ ღვთის წინაშე მართლები ვიქნებით.

იმითი ვიხაროთ, რომ ჩვენი ცხოვრება წმინდაა. ზოგჯერ შური შეიპყრობს ადამიანებს. სულხან-საბას განმარტებით, შური არის მწუხარება სხვისა სიხარულსა და სიკეთესა ზედა, ანუ ეს არის, შეიძლება ითქვას, სიხარულის ანტიპოდი, რომ ვიღაც ხარობს სხვისი სიკეთით. ვხედავთ ასევე ადამიანს, რომელსაც შეიძლება უახლოესი ადამიანის სიხარულიც კი აწუხებს და გულს უკლავს.

მე შეიძლება არც მქადაგებელი ვიყო, არც მშრომელი, არც ხელოვანი, მაგრამ იმავდროულად მეც ვიღებდე იგივე პატივს, იმიტომ, რომ არ ვარ შურიანი . იმიტომ, რომ მიხარია, რომ უფალმა ჩემს გვერდით მყოფში ღვთისგან მოცემული ტალანტი ააღორძინა და არ გაფლანგა. სიხარული უფრო მეტია წუთისეფელში. არჩევანი მარადიულსა და დროებითს შორის რთული გასაკეთებელია. თუ ვირჩევთ დროებითს, ვკარგავთ ორივეს, რადგანაც მარადიულზე თავად ვამბობთ უარს, დროებითი, დროებითია და ერთ დღესაც თვითონ გვემშვიდობება. მარადიულისთვის გვინევს ცოტა მეტი ღვაწლი, რომელიც მაინც ტკბილია, რადგან უფალი გვპირდება, ტვირთი ჩემი ტკბილ არს და მსუბუქ არს და მისი შედეგი კი რა თქმა უნდა მარადიული სიხარულია. ვუსურვებ ყველა მართლმორწმუნეს მარადიული სიხარული რ მოკლებოდეს.

ღმერთი თავად არის სიცოცხლე, ღმერთს სიკვდილი არ შეუქმნია. სიკვდილი ცოდვის ნაყოფია. სიკვდილი არის ყველაზე უფრო არაბუნებრივი რამ რაც შეიძლება ამ სოფლად არსებობდეს. ამიტომაც თავად მაცხოვარი წუხს და დარდობს. როგორც ამ მონაკვეთში წერია იოანეს სახარებაში, თვითონ არის შეძრწუნებული და შინაგანად სულიერად განიცდის. ხოლო ის რომ ჩვენც ვდარდობთ ჩვენს გარდაცვლილებზე, ამაში არაფერია არაბუნებრი, ესეც უნდა იყოს ზომიერი. კარგად უნდა ვიცოდეთ, რომ მარადიული აღდგომისას აუცილებლად შევხვდებით ერთმანეთს. ღმერთმა ინებოს მერეც ღვთის მადლით შევხვდეთ ერთმანეთს.

სტატიის ავტორი: თეა ცაგურიშვილი

<http://karibche.ambebi.ge/qristianuli-ckhovreba/sultha-kavshiri/8210-gardacvlilis-sulisathvis-sikharulia-is-rom-misthvis-dzvirfasi-adamianebi-ganskhvavebulad-ckhovroben.html>